

Pauro Korose ezektsa bo ziwatahaka

Amata, Epararas tihi ziky Korose ezektsa Sesus harere nitsasoko. Sizubarētsa ihumo sispirikporētsa niyziknaha. Bykyze ustsya myhyrinymyrykynahatsa wasanibara ty nisihyrynymyryky iwaze nisimiwykynaha, wastuhu Sesus humo batu sispirikpohuk. Iwaze Pauro ispe niy:

— Sesus humo zuba ma tahaktsa atahi zuba mysopyksapybyri humo mymyokzohik —. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Deus soho humo tanymyryky.

¹ Uta Pauro. Kiristu Sesus zikygzota. Tubabatu Deus kape niy:

— Ikiakta myzubaha bokta. Wasaniha ty sibo tytsaso — niy.

Hyĩ iky. ² Abaka ikiahatsa bo piwatahaka Timoteo katuk. Atahi mytuky mytuk Sesus harere bo hyĩ mynakara. Ikiahatsa Korose ezektsa bo tawatahaka. Ikiahatsa mytukytsa niwatihi Sesus harere bo hyĩ tsimykaranaha ihumo ahaspirikporētsa. Uta Deus bo mopamykysoko:

— O Deus myzo. Iki Korose ezektsa tysipokzitsiki, ahumo sakurētsa moziknaha — my.

Iwa Deus bo ahatsyhyryze mopamykysoko. Iwa Deus nizihikik.

Pauro Deus bo nipamykysoko, ihumo tsakurēta nikara.

³⁻⁴ Hawa ikiahatsa Kiristu Sesus harere bo hyĩ tsimykaranaha iwatsahi ihumo ahaspirikporētsa tsimoziknaha. Hawa Deus tyryktsa humo ahamypokzitsiukrētsa anahi botu tsiwabynaha. Iwatsahi

katsa ahatsyhyryze Deus bo tsimypamykysokonahaze mykurētsa. Deus Sesus Kiristuzo bo tsimypamykysoikik-naha.

— O Deus Korose ezektša humo mykurētsa. Tynasipokzitsiki — tsimaha. ⁵ Tapara Sesus soho wasaniha tsiwabynahaze yhỹ tsikaha. Katsaktša ahape tsimaha:

— Sizubarētsa asahi Sesus humo sispirikpotsa Deus tuk mynapykyryknaha tsimaha, iwatsahi ahaspihikrētsa tsikykaranaha. Ikiahatsa Sesus harere bo hỹ tsimykaranaha iwatsahi tsimyhyrikosokdanaha zeka Deus tuk tsimypykyryknaha. Ana harere bo hỹ tsimykaranaha ana humo hi ahaspirikporētsa tsimoziknaha. Iwatsahi Deus tyryktsa humo ahamypokzitsiukrētsa. ⁶ Deus pahapokzitsiki. Mywatu namypokzitsiki anahumo hi ahahyrinymyrētsa. Deus wasania ty nikaraze tsiwabykynahaze wasani tsikaha. Abaka ustsā kytsa Deus wasaniha piwabykynaha. Ahawatsa Sesus harere bo hỹ mykaranaha iwatsahi ihumo sispirikporētsa. Deus tyryktsa humo simypokzitsiukrētsa. Deus tuk mynapykyryknaha anahi aha watsa piperykynaha.

⁷ Epararas Sesus soho ahabo nitsasoko. Atakta mytuk nikara. Sesus pokzitsiwy tuk tarabaja ziknakara. Kiristu tsumuēhītsa niyze mytsyhyryze nimitysumuēhīkī. ⁸ Ata hi:

“O Korose ezektša Sesus tuktsa humo tyharape pokzitsinaha. Deus hyrikoso situk mynapykyryk iwatsahi Deus tyryktsa humo simypokzitsiukrētsa” — niy.

⁹ Ana tsiwabynahaze ahatsyhyryze Deus bo ziknapamykysokonaha. Katsa ahatsyhyryze Deus bo tsimypamykysokonaha:

— O Deus Korose ezektša mytukytsa tsihyrinymyry. Hawaha mozurukunaha humo tsihyrinymyry. Imys-

apybara sibo tsiwatawy. Aokze wasaniha humo tsihyrinomyry. Ahyrikoso mysihyrinomyryky iwatsahi hawaha humo mozurukunaha zeka mytsaty maha — tsimaha. Ispe tsimaha:

— O Deus hyrikoso pahahyrinomyryky — tsimaha.

¹⁰ Iwa zeka ihyrinomyrytsa hyĩ tsimykaranaha zeka hawa ha sa Deus mozihihikik tsimykaranaha. Myzibytuhukutu mypehakatsa ahahumo tsakurēta. Hawa haty tsimyzurukunaha zeka tsakurēta. Kytsa kino niwatihi tsysipokzitsikinaha. Iwa tsimyzurukunaha Deus soho tsipinomyrytohinaha.

¹¹ Iwatahi Deus bo mopamykysoko:

— O myzo ikia Korose ezektsa ahumo sipunihikrētsa moziknaha. Ikia zuba tsapunihikrēta. Ikia tsamysapyrēta iwatahi tsysipunihikwyky. Iwaze sipunihikrētsa moziknaha. Kytsa mysimyjakaranaha zeka tsysibetsa. Sinini mykaranahaze ahumo siakubyrisorokrētsa — my iwa Deus ahatsyhyryze mopamykysoko my. ¹² Deus myzo mypehakatsa my. Okoroze kywaha tisapyrēna bo iktsa tsimaha. Katsaktsa mypehakatsa harere bo hyĩ tsimaha zeka kytsa watsa tisapyrēna bo iktsa maha my. Ikiahatsa Deus tyryktsa tsimoziknaha. Tatyryktsa mysipokzitsiki. Amy isapyha piperyky iwaze hi ikiahatsa bo nyny my, ana hi taperyky. Ahakuhuktsa. Deus pe tsimaha:

— O Deus ikia zuba tsamysapyrēta. Ikia humo ka mykurētsa. Katsa ikia tyryktsa tsimoziknaha. Mykurētsa tsimoziknaha — my.

¹³ Satanasi batu imysapy. Kytsa papatu ituktsa imysapybara ty nikaranaha iwororobara siakparawy unata kywaha my. Ityryktsa simysapybyitsa mykaranaha. Imysapybyikia ty mykaranaha anatyhi ityryktsa mykaranaha. Deus babata zuba mymybetesaka iwatsahi Satanasi tserekeknaha. Abaka Satanasi harere bo ba ma

tsimaha. Deus tse harere bo zuba hyĩ tsimynakaranaha. Deus tse zuba myhumo tsimypokzitsiarēta. Atahi namybetesa. ¹⁴ Sesus tazo bo mymyoktyhyryk. Nihyrikosokdaze Deus mysapybyri ihumo nimyokzohik. Abaka Deus okzeka wasani niyzik iwatsahi mykurētsa hỹ.

Kiristu myhyrizikwy babata my.

¹⁵ Nanabyi isuknihyize ba amy tohi bo zikozonaha Kiristu ta Deus wata. Kiristu tsinynaha. Deus bo ka ba zikozonaha. Kiristu zuba tsinynaha. Kiristu ta Deus tse babata niy. Estuba zubata itse. Deus nanabyity tysukni ahabyize Kiristuta koikny baktatu ituk ziknapykyryk. Atahi taparakta tu.

¹⁶ Deus nanabyi Kiristu humo nizukniki. Deus bijoikpe mybarawy ahapetuk nizukninaha. Nawa ha ty nanabyi bo natanykynaha. Deus Kiristu tuk nizuknikinaha. Nanabyi zinyahabikia mybarawy humo kino niwatihi Deus Kiristu tuk nizuknikinaha. Bijoikpe iknyktsa Deus tsumuēhĩtsitsa niwatihi nisisuknize. Wastuhu hyrikoso sapybara niyziknahatsa kino niwatihi Deus hi nisisukni. Deus, Kiristu harapetok sihumo nanabyi nizukniba. Atahi tazo tuk myzubaha nizuknikinaha. Anatyhi Kiristu bo niy, iwatsahi myzubaha Kiristu harere bo yhỹ mykaranaha.

¹⁷ Tapara nanabyi suknihibyize tu Kiristuta tapara kino niwata tu koikny baktatu. Bijoikpe mybarawy iwaha ihumo mynapykyryk. Iwaha hi tasapy eze tu mynapykyryk. Ihumo nanabyi tisapyrēna maha. ¹⁸ Sesus Kiristu parakbaha mysiakzo. Sizubarētsa mozumubana-haze iharere piwabynahaze mysiakzoko. Mypehakatsa babata my. Atahi myharek wata. Hawa myharamitsĩ humo hi mytsaty tsimykaranaha iwa tsimykaranaha kat-saktsa Kiristu harere humo tsimykaranaha. Myzubaha hi mynury wata. Iwaze Kiristu tyryktsa iharere bo zuba hyĩ

mykaranaha. Atahi Deus tse babata. Nihyrikosokdaze Deus zihyrizikpowyze tsimysapyrēta niyzik. Myzubaha iharere bo hỹ mykaranaha. Atahi myhyrizikwyrēnikita babata niyzik atahi abazubata niyzik, ba hawa tohi zikzukninaha.

¹⁹Deus tatuktuka nikara — O katse kawata mozihikik — Kiristu Deus astsatu my.

²⁰Mybarawy ezektisa Deus bo ma zikahabyitsa. Sinini ykarawy ezektisa kino niwatihi Deus humo tahakyrikinaha. Iwaze Deus mybarawy ezektisa humo taokaniki iwatatu mahani iokani hyrinymyry iwaze hawa meky watu moziknaha mytsaty nikara. Atahi:

— Katse babata iharapatawyhyta humo pibezenhaze iwaze meky watu mytsaty mykaranaha. Kaharere bo hỹ mykaranaha — niy. Iwa Deus tatuktuka nikara. Mybarawy ezektisa humo mahani iokanihyrinymyry.

Abaka Kiristu harereziuwytisa tsikyziknaha.

²¹Taparaka Sesus harere bo ma ahabyitsa iwatsahi Deus sukyrytsitsa moziknaha. Ikiahatsa ihumo batu ahakparawy. Iwatsahi hawa sa batu ahasopyksapy ana humo hi mytsaty tsikykaranaha. Hawa sa batu imysapy tsikykaranaha. Deus ahakparawybyitsahi iwatsahi ahamysapybyitsa tsikykaranaha. ²²Abaka meky watu tsimoziknaha. Deus harereziuwytisa zuba tsikyziknaha. Itse babata ahasapyzekenihyrikosokda iwatsahi itukytsa tsimoziknaha. Iwatsahi wasani tsimykaranaha. Iokzeka tsimyzumunahaze batu ahasikpyby tsimaha. Batu aty tohi ahasoho humo:

— O ikiahatsa batu ahasopyksapy — maha. Ikiahatsa hi ahamysapyrētsa tsimoziknaha h̃y.

²³Ikiahatsa hi Deus harere humo tsimyspirikpotohinaha. Iharere bo ka hỹ tynakaranaha. Katsakta Deus tuk mywahi tsimynapykyryknaha ana hi taperyky. Ipery

humo ahapunihiku ja. Utakta Deus wasania ty motsasoikik anahi kahyriziktsokzawy. Nanabyitaba kytsa bo Deus wasaniha motsasokonaha hỹ.

Pauro Sesus tuktsa nisitsumuēhīekik.

²⁴ Abaka kakurēta. Ahatsyhyryze sinini mykaratatu kakurēta. Kiristu myzubaha bo sinini nikaraze. Asaktsa mozumubanahaze iharere piwabytnaha sihumo sinini mykara. Asahi Kiristu nury watsa. Iwatahi uta kino niwatihi sinini mykara. Ikiahatsa pokzi Kiristu nury watsa sinini mykara. ²⁵ Deus kape niy:

— Wasaniha ty tytsasokokta. Kytsa Sesus humo sispirikporētsa asahi katyryktsa maha iwatsahi sibo wasaniha tsimytsasoziuku! Katyryktsa tysitsumuēhī — niy. Atahi anaty kabo ziwatawy iwaze hi nanabyitaba wasania ty motsasoziuku.

²⁶ Taparaka Deus batu harere aha kytsa iharere batu siwabyhy. Deus wasaniha batu aty tohi ty tyhyrinomy. Abaka meky watu. Kytsa Deus harere bo hỹ mykaranaha ihumo sispirikporētsa iwatsahi wasani haty pinymyrykynaha.

²⁷ Abaka myzubaha iharere piwabykynaha ana hi Deus mozihikik. Taparaka batu ahahyrinomyry abaka wasania ty pahahyrinomyryky. Iharere tisapyrēna, iwatahi myzubaha bo motsasoko. Sudeustsabyitsa bo kino motsasoko. Tapara Kiristu ahatuk ziknapykyrykze batu ahahyrinomyryhu abaka ahahyrinomyrētsa hỹ. Deus humo hi ikiahatsa ituk tsimynapykyrykynaha nizihikik iwatahi tsakurēta.

²⁸ Katsaktsa Sesus Kiristu soho tsimytsasokonaha. Nanabyitaba Sesus soho tsimytsasokonaha. Hawa imysapybara humo maha zeka tysispirikpokonaha. Nawa mozurukunaha zeka mysihyrinomyrynaha. Nawa Deus

mozihikik iwa mozurukunaha. Tymi habiytsa tsiksihyrinymyrybanaha. Iwaze Deus okze mozumunahaze atahi:

— O asahi wasani mykaranaha. Kiristu tuk mozurukunaha iwatsahi simysapyrētsa moziknaha — my. ²⁹ Iwatatu utakta mysitsumuēhīkī. Deus tazikwy ty kabo nyny mykara iwatahi ihyriziktsokzawy humo mynakara. Atahi moziktsumuēhīkī, ana humo hi mysihyrinymyryky.

2

¹ — O kytsa kaharere tsiwabytoktonahaktsa. Hawa ahatsumuēhīekik, naha hi tsinymyrynaha. Raodisija ezektsa kino niwatihi asahi Sesus harere bo hyŷ mykaranaha iwatsahi ihumo sispirikporētsa, iksitsumuēhīkī. Utsa kytsa Sesus tuktsa kanyhybyitsa kino iksitsumuēhīkī. ² Iwatsahi sizubarētsa sipunihkrētsa moziknaha. Tyharape pokzitsikinaha. Kahyriziktsokzawy humo ikiahatsa ahakurētsa tsimoziknaha. Tsimyharape pokzitsikinaha zeka Deus harere tspinymyryziunaha iwaze ahaspirikporētsa tsimoziknaha. Taparaka Deus harere batu aha ana humo hi Kiristu kino pahahyrinymyryky. ³ Ata zuba Deus myspirikpowy mynatsasoko. Deus tasopyk mynatsasoko. Katsaktsa Kiristu harere bo hyŷ tsimykarannahaze wasaniha humo myhyrinymyrētsa.

⁴ Iwatahi ahabo piwatahaka “Mytsatzyiutaha kytsa!” Iwaze ba aty tohi ahabo zahaspihikbata. Siharere wasani mykaranahatsa watsa. Iwatsahi siharere bo ka waby waby byitaha! Pahaspihikbatakanahaze pahamyikinaha.

⁵ Iwatahi utakta ahasoho bo mytsaty mynakara. Utakta ahatur byitatu ahasoho bo mytsaty mynakara. Iki-ahatsa Kiristu humo ahaspirikporētsa ana humo hi

kahyrinymyrēta. Ikiahatsa Kiristu humo ahaspirikporētsa tsimykaranaaha iwaha humo kakurēta — my.

Kiristu tuk tsimyzurukunahaze meky watu tsimoziknaha.

⁶ Ikiahatsa hi:

— Sesus imysapyrēnikita. Iharere bo zuba hỹ tsimykaranaaha — tsimaha. Iwaze iharere bo zuba hỹ tynakaranahaktsa! ⁷ Hwi jobonitakta iharatatsa wytyk zihiboani tahasapynaha niy. Katsaktsa hwi watsa Sesus humo myspirikporētsa iwatsahi mypunihikrētsa tsimoziknaha. Iwatsahi ihumo tsimyspirikpotohinahaktsa! Nawa isoho tsinymyrykynaha ana ty hi tsimyzurukunaha. Deus myzo bo tsimypamykysokonaha:

— O myzo ikia zuba tsamysapyrēta. Ikia humo ka mykurētsa — tsimykaranaaha.

⁸ O kytsa pykyhytutaha! Sesus soho humo mytsatyziu-tahaktsa. Utsa kytsa hi:

— Sesus harere bo batu h̃y — zikaha. Asa hi ihumo batu sispirikpo. Siharere bo ka waby waby byitaha. Ikiahatsa siharere bo yh̃y tsimykaranaaha zeka pahaspikhikbatakanaha asahi Deus harere bo batu h̃y mykaranaaha. Myzotsa siakbatsa harere humo zuba pahahyrinymyrykynaha. Siharere ty pahaspikhikbatakanaha ahabo mybarapetu mykaranaaha. ⁹ Kiristu Deus wata. Sesus mybarawy bo inasikze nimyhyrinymyryky. Nawa haty Deus mykara anatyhi nimyhyrinymyryky. Kiristu mytukze zikzurukuze astsatu Deus niy. Kiristu bo tsikozonahaze Deus soho humo tsinymyrykynaha. Kiristu Deus wata anahumo hi Deus soho tsinymyrykynaha. ¹⁰ Kiristu harere bo hỹy tsimykaranaaha zeka Deus tazikwy ty mybo nyny my. Mymysapyrētsa tsimoziknaha. Kiristu imysapyrēnikita atahi abazubata my. Bijoikpe iknyktsitsa Deus tsumuēh̃itsitsa iharere bo hỹy mykaranaaha.

Hyrikoso sapybara Satanas tsumuēhītsitsa iharere bo hyĩ mykaranaha.

¹¹ Kiristu tazikwy ty mybo nyny mykara. Tazikwy humo ahamysapybyitsa tsikykaranaha anahi tsmoewynaha. Deus nimyokzo iwatsahi ihumo tsimynapykyknaha. Mekywatu mytsaty tsimykaranaha Deus humo zuba meky watu tsimoziknaha. Sudeutsa tahanury humo tahapiakzyzyknaha iwa meky watu nikaranaha. Siwatahawy humo Deus okzeka meky watu niyziknaha. Katsakta niwahabyitsa. Deus hi mybo nimywatawy iwaze ihumo meky watu mytsaty tsimykaranaha iokzeka metutu tsimykaranaha. Iwaze mynury humo batu mytywataha. Katsakta Sesus tuk tsimynapykyryknaha ana humo hi ahamysapyrētsa tsimoziknaha.

¹² Kytsa nimyharasusukunahaze moranahaze mymyhatoto nahaze kywa Kiristu nury nitsahoroknahaze kywahi. Deus Sesus izihyritzikpowy ikiahatsa kino niwatihi tsinahyritzikpobanaha Kiristu watsa, Deus zikwy humo meky watu mytsaty tsimykaranaha ahamysapyrētsa tsimoziknaha. Deus Sesus Kiristu izihyritzikpowy ana hi sizikwy atsatu. Ata bo hi hyĩ tsimykaranaha zeka ahamysapyrētsa tsimoziknaha.

¹³ Taparaka ikiahatsa siakbatsa watsa. Deus harere bo yhĩ ahabyitsa ziknakaranaha. Moises harere bo yhĩ ahabyitsa ziknakaranaha. Ahamysapybyitsa tsikykaranaha. Abaka Deus humo meky watu tsimoziknaha. Hawa Kiristu mytsaty mykara ikiahatsa kino niwatihi mytsaty tsimykaranaha. Ahamysapybyitsa tsikykaranaha humo nimyokzohik. ¹⁴ Deus harere humo tsikspirikponaha ka iharere katsa myhumo tsihokdaharēna iwatsahi ma ahabyitsa ziknakaranaha, iharere ty waby byizeka ana humo hi tsihyrinymyrēta. Iwaze Kiristu iharapatawyhyta humo nihyrikosokdaze

iwatahi Deus mysapybyi humo nimyokzohik. Ana humo hi nispiriktsokda baba mysapybyi zipykbaik. Hawa kytsa namy zibykykspyknaha bykyze tysirezo tsikaha, batu amy tohi ty zikaha. Iwaze astatu Sesus mysapybyitsa tu tsikykaranaha humo iwahatu niokzo. Abaka ba zikzisirezonaha tsizubarēna nepykba.

¹⁵ Kiristu hiba Satanans hyrikoso sapybara pehakatsa zikwy imysapybara zepykbaik. Iharapatawyhyta humo nihyrikosokdaze Satanans hyrikoso sapybara pehakatsa zikwy imysapybara zepykbaik. Iwaze myzubaha iwa zihyrinymyryknaha iwatsahi sisikpybyrētsa niyziknaha. Sesus ipunihikanikita ipokso sisikpybyrētsa nikaranaha.

¹⁶ Kytsa pahakzo zeka:

— O kytsa ana disahawy ty ka hauk hauk ahabyitaha. Ahaokpuwy ty ka tsō tsō byitaha! Nawa puruze tarabaja byitaha! Byzoje iokpezubakata mynayzikze tsikahamyikahanahaktsa sabado eze mybyrywy zuba iwaze tarabaja tarabaja byitaha! — mykaranaha. Iwa motsasokonaha zeka siharere bo waby waby byitaha.

¹⁷ Tapara Kiristu izumuze siharere bo yhỹ tsikykaranaha. Hawa ebuhuka bo iktsa tsimahaze anaka bamytohi, iwaze siharere ebuhuka hyrity waha Kiristu harere baba zuba my. Abaka Kiristu izumu iwatsahi siharere bo batu hỹ tsimykaranaha Kiristu harere bo zuba ma tsimykaranaha. ¹⁸ Asahi pahasapybyi tsihikiknahaze hi:

— Myharere bo yhỹ habyi zeka Deus sinini ykarawy bo pahapeha. Deus okzeka batu ahamysapy — mybarapetu mykaranaha. Siharere bo batu waby zikaha! Asa hi:

— Katsa zuba myhyrinymyrētsa babatsa — mybarapetu mykaranaha. — Mytsotospyk eze Deus bo tsikozonaha tsimykaranaha — mybarapetu mykaranaha. Hauk byize kytsa hi:

— O asaktsa simyharerewabyrētsa — maha niwahi mozihihiknaha. Bijoikpe iknyktsa Deus tsumuēhītsitsa bo iktsazuba maha. Hawa Deus bo tsimysakibazikiknaha asahi astsatu bijoikpe iknyktsitsa bo maha. Hawa mozihihiknaha zuba ana hi mykaranaha. Kytsa watsa mytsaty mykaranaha iwatsahi siharere batu ahawabyhy.

¹⁹ Abaka asahi Sesus Kiristu humo batu sispirikpo. Hawa imysapybara ty mytsaty mykaranaha. Simysapybyitsa pahamyi tsihihiknaha. Kiristu myharek wata. Ituktsa inury watsa. Mynury humo tsimynapykyknahaze iwa Deus humo mozihihik. Tsimymyphuhyrynahaze mypaikrētsa tsimoziknaha. Nawa tatu Deus zikwy humo wasani mytsaty tsimykaranaha ihumo hi zuba myspirikporētsa tsimoziknaha Kiristu humo zuba mytsaty tsimykaranaha.

Katsaktsa mymysapybyitsa tsikykaranaha Deus nimyokzo. Kiristu mysapyzedy nihyrikosokda. Abaka Kiristu tuk meky watu mysopyk tsimaha.

²⁰ Katsaktsa mysapybyitsa tsikykaranaha ana hi tsmoewynaha. Tsikykbakanahaze ba mytsaty zikaha anawahi katsaktsa Kiristu harere bo hỹ tsimynakaranaha, mysapybyitsa tsikykaranaha Kiristu zikwy humo tsmoewykynaha. Iwatsahi hyrikoso sapybara perytsa Satanas harere humo batu mykparawy. Iharere bo batu h̃y tsimykaranaha. Kytsa mysimiywynahatsa ahape maha: ²¹ — Ikiyahatsa na ahadisahawy my zeka hauk hauk ahabyitaha! Tummy humo kino niwatihi tsō tsō byitaha. Ahanamy humo ka paik paik byitaha! — mykaranaha. Siharere bo batu h̃y tsimaha.

²² Disahawy soho humo ba h̃y ahasopyk. Mydisahawy tsipihauknaha zeka kyze ity tsipikaranaha. Mynamyhuhuk zeka moryryba. Asaktsa Deus mymyhyrinymyryky

nahatsa batu tyso zikaha, hawa mytsaty mykaranaha zuba ana humo hi mymyhyrinomyryky tsihikiknaha.

²³ Kytsa sisopyk zubaha siharere piwabykynahaze mytsaty mykaranaha:

— O asaktsa ja sihyrinomyrētsa babatsa — mytsaty ahabyitsa mykaranaha. Sihyrinomyrētsa hyritywatsa asaktsa mybarapetu nikaranaha. Zimyikinaha. Kytsa asatu tahamyitsapyrikinaha zeka Deus harere bo batu hỹ mykaranaha. Kytsa tihi:

— Bijoikpe iknyktsa Deus tsumuēhītsita bo tsimysak-ibazikiknaha — maha. Iwa Deus harere bo batu hỹ zikaha. Asahi:

— O Deus katsaktsa ikia zuba mykparawy. Tsizubarēna ty abo nyny tsimaha — mybarapetu mykaranaha. Siharere ba zikmytsumuēhĩ. Batu isapy. Imysapybara ty tymoewy ahabyizeka ba ziksitsumuēhĩ. Zimiyihikiknaha iwatsahi batu simysapy nikaranaha.

3

¹ Ikiahatsa kino tsiknahyrikponahatsa watsa iwatsahi Sesus tuk tyzurukunahaktsa kytsa! Sesus harere bo zuba hỹ tynakaranahaktsa! Sesus Kiristu Deus wata my, atahi Deus tuk mynadyhyky siharere bo zuba hỹ tynakaranahaktsa!

² Sibō bijoikpe bo mytsaty tynakaranahaktsa. Hawa mynakaranaha bo hi mytsaty tsimykaranaha. Hawa Deus ahatsyhyryze mykara ana soho humo hi mytsaty tsimykaranaha. ³ Ikiahatsaktsa siakbatsa watsa. Tapara kytsa harere bo yhỹ ziknakaranaha. Abaka batu. Kiristu harere bo zuba ma tsinakaranaha. Atahi bijoikpe eze mynapykyryk. Deus tuk atatu my, iwatahi Deus hyrikoso mytuk mynapykyryk. Asaktsa Sesus harere bo batu ma zikaha batu sihyrinomyry iwatsahi batu sispirikpo.

⁴ Ikiahatsa hi ahamysapyrētsa tsimoziknaha. Kiristu humo mekywa tu tsimoziknaha. Iharere bo zuba ma tynakaranaha. Iwatahi ata kino mybarawy bo myziksi-zoze ikiahatsa ituk tsimyzahakahazonaha. Kiristu humo ahamysapyrētsa tsimoziknaha. Atahi isopykziuhanikita my.

Taparaka mysopykwy. Abaka Sesus sopykwy ezytyk ty tsinakaranaha iwa Kiristu tuk tsimyzurukunaha.

⁵ Ikiahatsa ahamysapybyity ziknakaranaha bo yh̄y yh̄y ahabyitahaktsa! Imysapybara ahamyzihih zeka awatutaha. Utsa kytsa okeza ty ka hua hua byitaha. Kytsa wytykyryk mysioktyhyryknaha zeka myi myi byitaha ahasopyksapyhu ja. Makutsa ba zikarapewonaha. Ahabo zuba mytsaty mytsaty byitaha. Ahazokdi byihuja! Sizokdirētsa kytsa deusbyitsa pe yh̄y sisopyk watsa maha. ⁶ Ikiahatsa ana ty hi tsimykaranaha zeka Deus aha humo takyri. Ikiahatsa anatyhi ahasopykze Deus ahahumo takyri iharere bo batu h̄y zikaha.

⁷ Taparaka ikiahatsa kino iwa zikzurukunaha. Ikiahatsa tsimyikiknaha ana humo zuba mytsaty tsikykaranaha.

⁸ Abaka mekywatutaha! Ahamysapybyiri tsimoewynaha. Ahaokani byihuja! Ahamysapy byihuja. Ahaharerewabymybara byihuja. Ahasakpare byihuja! Kytsa humo ka ahasakimyija byihu.

⁹⁻¹⁰ Taparaka ahamysapybyitsa tsikykaranaha. Abaka Kiristu humo ahaspirikporētsa mekywa tu tsimoziknaha. Abaka Kiristu wata tsimoziktohinaha iwaze Deus soho humo ahahyrinymyrētsa babatsa tsimoziknaha. Iwatsahi ahape ty spihikbata spihikbata byitaha! ¹¹ Kiristu humo mekywa tu tsimaha, Sudeustsa Sudeutsabyitsa iwa Deus okzeka astsatu. Kytsa asahi sipiakzyzyktsa sipiakzyzykbyitsa Deus okzeka astsatu. Bipyritsa sihyrinymyrybyitsa, sitsumuēh̄itsitsa siokryrsarobyitsa asa kino Deus okzeka

astsatu. Asaktsa Kiristu harere bo zuba ma mykaranaha. Ana bo hi zuba mytsaty tsimykaranaha. Iwaze Kiristu abazubata niyzik.

¹² Katsaktsa Sesus harere bo ma tsimykaranaha ana humo hi meky watu tsimoziknaha. Deus myhumo tsimypokzitsiarēta babata iwatahi nimywatawy ityryktsa tsimoziknaha. Iokzeka wasani tsimaha. Mysapybyi ty tsimykaranaha zeka Deus mybo iktsa myze Sesus humo mymyokzohik iwatsahi tyharape pokzitsikinahaktsa! Tyharape sakihiknaha. — Uta zuba kahyrinymyrēta — ba ziky ustsā kytsa harere bo wabytaha! Ahamyzihikrētsa iwaze ustsā harere tsiwabytaha. Ahakubyrisorokuja!

¹³ Hawa hatsa kytsa pahasapybyikinaha zeka tsysipokzitsinaha. Simymyijanikitsa tsysipokzitsinaha. Ba sihumo ahasakpare. Ahakubyrisorokuja! Ahamysapybara ty tsikykaranaha ana hi Kiristu zahaokzo iwatsahi kytsa pahasapybyikinaha zeka tysiokzonaha awatutaha mytsaty mytsaty byijataha tsysipokzitsinaha iwaze Kiristu watsa tsimoziknaha. ¹⁴ Iwa tsimyzurukunaha zeka wasani tsimaha. Tyharape pokzitsikinahaktsa! Iwa tsimyzurukunaha zeka wasani my. Atsezubaha tsimypykyryknaha zeka ahakurētsa. Astsatu mytsaty tsimykaranaha. ¹⁵ Kiristu zuba pahakusukniki iwatsahi astsa botu mytsaty tsimykaranaha. Ikiyahatsa hi:

— O Kiristu tmytsumuēhikta. Iwaze myhyrinymyrētsa babatsa tsimoziknaha. Katsaktsa Kiristu humo atsa botu mytsaty tsimykaranaha — tsimaha. Ana humo hi Deus nimywatawyhik. Iwatsahi Deus bo tsimypamykysokonaha:

— O myzo ikia zuba tsamysapyrēta. Ikiā humo ka mykurētsa — tsimykaranaha. ¹⁶ Deus wasania ty Kiristu soho humo tyzurukunahaktsa! Kiristu wasaniha humo

tyharape hyrinymyrynaha. Iwaze myhyrinymyrētsa baba tsimoziknaha. Iwaze Deus hyrikoso humo tysakibazikiknahaktsa! Deus harere ty tysakibazikiknahaktsa! Ikiahatsa hi:

— O Deus myzo ikia zuba tsamysapyrēta — iwa tsimysakibazikiknahaze. ¹⁷ Iwatsahi nawa ha ty tsimykaranaha zeka ana hi Sesus tuktsa pokzi tsimykaranaha. Nawa ha ty tsimytsakonaha zeka ana hi Sesus pokzi tsimykaranaha. Iwaha hi Deus mozihikik atsatu tsimykaranaha. Deus bo tsimypamykysoikiknaha:

— O Deus myzo tsamysapyrēta. Sesus mysapyzeyki nihyrikosokda iwatahi tsamysapyrēta — tsimykaranaha.

Abaka Kiristu humo ahamysapyrētsa tsimoziknaha iwaze wasania ty tsimyzurukunaha.

¹⁸ — O wytykryk sipytsakaza ahapytsa harere bo yhy tynakaranaha. Ikiahaka Sesus tuk tsiza iwazahi ahapytsa harere bo yhy tynakaranaha. Iwa zeka wasani my — my.

¹⁹ Makutsa pe my — O kytsa ahaokeza humo ahamy-pokzitsihuktsa. Ba sihumo ahasakpare. Tysipokzitsikinaha. Iwa zeka wasani my — mykara.

²⁰ — O ahahyrytsa kino niwatihi. Ikiahatsa ahazotsa harere bo ma tynakaranaha iwaha hi Deus mozihikik. Sesus tuktsa humo ahazotsa harere bo hyhy tynakaranaha. Iwa zeka wasani my — mykara.

²¹ — O sizotsa ahahyrytsa iwastuhu hatyty tynasipehakanaha. Tsimysibetsakikiknaha zeka siakubyitsa moziknaha — mykara.

²² — O sitsumuēhītsitsa siokyrysarobyikitsa. Tyzibytuhukutunaha azihitsa harere bo zuba hyhy tynakaranaha. Iwaze “O ikia wasani tsimy” my, ana hi tsiwaby tsihikiknaha. Siharere eze zuba ba tarabajaziu zikaha. Sesus pokzi ahahyritzokzawy pykyhytutaha!

Tarabajaziu tsimykaranaha humo tyzibytuhukutu naha. Azihitsa pahasukparaka zeka tarabajaziu tsimykaranaha. Azihitsa ahaty sukparabyize kino niwatihi tarabajaziu tsimykaranaha hỹ. Iwa zeka wasani my — mykara.
²³ Ahahyriziktsokzawy humo. Ahakubyrisorokoktsa. Ikiahatsa azihitsa tsyhyryze tarabaja tsimykaranaha hỹ. Deus humo kino niwatihi itsyhyryze tatsumuēhĩkĩ tsimykaranaha ana humo kino mytsatyziu tsimaha. Iwatsahi ipokzi tarabajaziu tsimykaranaha.

²⁴ Kiristu mypehakatsa babata my, ikia ituk hi tarabajaziu tsimykaranaha. Atahi isapyrēnikia ty mybo nyny my. Iwatsahi tarabajaziu tsimykaranaha zeka hawa ihuak ty mybo nyny my. ²⁵ Katsa hi tamiy zeka sinini tsimykaranaha. Deus babata zuba mysoho humo tsihyrinyrēta amy ty mysoho motsasoko wasani my. Iwa hỹ.

4

¹ — O sitsihitsitsa ahatsumuēhĩtsitsa asahi batu siokyrysaro humo nyny hukbyikitsa asa humo hi wasani tahaktsa! Tysisakihiknahaktsa! Mytsatyzitaha! Ikiahatsa humo kino ahapehakatsa bjoikpe ezekta my. Atahi pahapokzitsiki ikiahatsa kino niwatihi tsimaha, ahatsumuēhĩtsitsa tsysipokzitsikinaha — my.

Myspirikpowy.

² O kytsa Sesus tuktsa Deus bo tynapamykysoikiknahaktsa. Ahazikabyihuktsa Deus bo tsimypamykysonahaze wabyziutaha! Ikiahatsa hi:

— O Deus ikia humo ka mykurētsa — tsimynakaranaha.

³ Deus bo tsinapamykysokonahaze katsa mybo kino tsimyzapykynaha. Katsaktsa Deus wasania ty tsimyt-sasokonahaze kytsa ba zikmykninaha ana humo hi tsimyzapyky tsihikiknaha. Taparaka Deus wasania

ty Kiristu soho ty myzubaha bo batu tyso, abaka myzubaha bo wasaniha mybo motsasoko katsa eze tu tsimytsaso tsihikiknaha hỹ. Ikiatsa Deus bo mytsyhyryze typamykysonahaktsa. Deus harere humo zuba ikykara tahi sakyriukrēnikitsa hurukwy bo zikoktyhyryknaha. ⁴ Iwatsahi Deus bo tsimypamykysonahaze tsimyza-pykyknaha:

— O myzo Pauro tuktsa tysitsumuēhĩ. Wasani mypubara ty motsasoziukunaha iwatsahi kytsa iharere piwabytoktonaha — tsimaha. Iwa tahaktsa.

⁵ Kytsa Sesus humo sispirikpobyitsa wasani taha. Ahaspirikpohuktsa ana hi pinynaha. Iwaze Sesus soho sibo tytsasonaha. ⁶ Kytsa bo tsimypamykysokonahaze ahaharere tisapyrēna tsimaha. Kytsa ahaharere wasaniha humo siakparawy my. Iwaze piwabytoktonahaze. Ahaharere piwabytnahaze — O siharere humo mykurētsa. Wasani my. Tahawaby tsihikik — maha.

Abaka pepykyk iwatahi mytukytsa bo mytsaty mykara.

⁷ Tikiko kasoho ababo motsasoko. Atakta Sesus harere bo hỹ mynakara tahi atakta katsy wata. Atakta kakparawy, mytuk Sesus soho humo mymytsumuēhĩekik. Sesus tsumuēhĩtsa babata my. ⁸ Iwatahi ababo pipeha. Mysoho motsasokoze ahakurētsa tsimoziknaha. Hawa tsimyzurukunahaze anahi motsasoze pahakusukniwyky hỹ. Wasani my.

⁹ Onesimu Tikiko tuk mokuru. Ata kino niwatihi Sesus harere bo hỹ mynakara iwatahi ihumo tispirikporēta. Wasani mozuruku. Katsaktsa ihumo mypokzitsirētsa. Atakta Korose ezekta my. Hawa tsimykaranaha ababo motsasonaha.

¹⁰ Aristarakus katuk sakyriukrēnikitsa hurukwy eze mopykyryk. Atahi:

— O Korose ezektsa humo kahyrizikbarēta mykara — niy. Marakos kino niwatihi ahahumo tsihyrizikbarēta, atahi Baranabe tsy. Isoho botu ziwatahaka ahabo pomo zeka ipe tsimaha:

— O pakutynykta! Kawahoro humo awanu ty hāitykta. Mytuk tsikadisaha! — tsimaha. ¹¹ Sosue atsatu Sustas inarokota kino niwatihi ikiahatsa humo tsihyrizikbarēta. Ata kino Sudeu. Harakykbyi Sudeutsa asaktsa katuk Sesus humo myzitsumuēhikīnaha. Kytsa Sesus humo sispirikporētsa ana humo hi tarabaja mykaranaha. Iwatahi kakurēta. Ziktsumuēhikīnaha humo kakurēta hỹ.

¹² Epararas Sesus tsumuēhītsa niwatihi. Atakta ahudikhudikwy ezekta my ahahumo tsihyrizikbarēta. Atahi Sesus harere bo hỹ mynakara. Deus bo ahatsyhyryze mynapamykysoko. Atahi:

— O Deus myzo Korose ezektsa tysipunihikwyky iwatsahi Sesus humo batu sisikpyby. Asaktsa Sesus harere bo hỹ mynakaranaha iwatsahi ihumo sispirikporētsa. Sispirikporētsaze Sesus humo mospirikpotohinaha — my. ¹³ Atakta ahatsyhyryze tarabajaziu mykara ana humo hi kahyrinymyrēta. Kytsa Raodisija ezektsa, Hieraporis ezektsa iwatsa sizubarētsa tsyhyryze tarabajaziu mykara. Wasani mykara.

¹⁴ Rukas mediko mozororowykytsa katsaktsa ihumo mypokzitsirētsa. Atakta simyitsapyritsa nasipokzitsiki. Atakta Demas tuk aha humo sihyrizikbarētsa, ahasoho bo mytsaty mynakaranaha.

¹⁵ Katsa ustsā Sesus tuktsa humo myhyrizikbarētsa. Asaktsa Raodisija ezektsa. Ninapa bo asaktsa iwahoro eze ziknapykyknaha asa humo hi myhyrizikbarētsa.

¹⁶ Kyze papeu iwatahaha tsipinynahaze Raodisija ezektsa bo nyny tsimaha. Iwaze Raodisija ezektsa kino niwatihi tsipinynaha. Utakta usa papeu sibo iwatahaka ana

hi kytsa zibykyryknaha. Asahi anapapeu ty ahabo nyny maha. Iwaze papeu zisapyzykynaha. Sipapeu iwatahaha tsipinyaha. ¹⁷ Arakipus pe tsimaha:

— O Arakipus mypehakatsa Sesus hyriziktsokzawy humo zipaha. Anaty tsimyкта — tsimaha.

¹⁸ Abaka utatu piwatahaka, *Pauro ahahumo tsihyrizik-barēta* mykara ana kino piwatahaka. Deus bo katsyhyryze tsimypamykysokonaha. Siakyrükřēnikitsa hurukwy ezektatu mykara. Kahumo ahaspiriktsokdabyihu!

Deus pahasapywyky.

Deus bo uta kino ahatsyhyryze mopamykyso:

— O Deus myzo Korose ezektsa tysipokzitsi — my. Iwa. Niwazuba.

Pauro

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
